

Aimun e ui nashekanitsh ne mashinaikan tshe atusseshtakanitsh

« Miam tshitanashkutapaminuatsh ka apashtatau kukushanahtiku ka takuhuaka utilu, mamu kuishk takuhitshetau »



Tshishe Manitu ka kamilituk assilu, tshi ueueshtau tshetshi taik nite kie milu-ilniuk mahk pakassuik. Ekuan nite kie Tshilanu Pekuakamiulnuatsh, Tshitassinu tshutuhtanau. Tshilanu ne assi, takuan tshetshi iakua tutamuk. Shuk mishta-tshishpeuatetau. Ekute nite kassinu e takuatsh ka ilniumakatsh. Kie ekute nite natuapatamuk shutshishiun, pakushelitamun mahk miluelimun.

Tshitanashkutapaminuatsh mishta-ueshkatsh pamishkapanitsh shakahikanilu mahk shipilu, apashtapanitsh kapatakanilu mahk uapatamupanitsh utshilu. Tshi nametauatsh ishpishatsh assi. Eshk^u nukuanilu u matukapuau, kakuetetau mahk uapatakanilu nite ka ishpitelimatau nelu ka akutatau utukuan ushkanilu aeshisha.

Eishi ilniuk tshitshisselitenanu kassinu eishi atussanuatsh nutshimihtsh. Ilnu tshisselitam^u eishi ilniut kie nishtuapatam^u eishi natuhunanuatsh. Ekuan nelu e tapahiuatshet Tshitassinatsh tshetshi kassinu auen iakua tutak e natuhut.

Nashemuatau ka uapatalamahikuik tshisselitamuna. Uapataliuetau eishilniuk nite Tshitassinatsh. Nehlukateu mishue tshitassinatsh, tshe nishtuapatakau tshitauassiminuatsh kaishpitalitakuatsh kanakatamakuik.

Milu-uitsheuatauatsh mishue ka apashtatau assilu miam tshinashkutapaminuatsh ka aitutau. Shash ueshkatsh, taship tshi apashtanau ishpitelitamun, uauitshitun, matunueun kassinu uelutishiuna apatelitakuan tshe nashamuk.

Tshilanu Pekuakamiulnuatsh tshuelutishinanu, tshitapashtananu ilnu-aimun mahk ilnu-aitun. Ishpiteljetau tshe ishpish ilniuk tshetshi taship ilniuumikatsh kie shutishimakatsh. Tshitshisselitenanu tshe ushkuishtamuk nehluen tshetshi kanuelitamuk kie tshe ashinehikuik. Ashu pashtinetau kie uelashk nehlu-aimihatauatsh tshitauassiminuatsh tshetshi ashinetau e nehluetau kie nishtunikau ilnu-aitun. Uiluu kuessipan tshe ashu pashtinekau. Ishpiteljetakunilu tshitauassiminuatsh kie aishkatsh auassatsh tshe nishtunika tshitaimunu. Takuanilu kassinu auenitshe tshe tapuetakau umelu ka mashinatetsh mashinaikan.

Tshi alimuhunanu nite uhtanatsh, muhk anutshish ashinetau katshi passeshkamuk. Nikan pimuhtetau. Tshikunuelitenanu tipatshimun, ilnu-tipatshimun.

Tshilanu Pekuakamiulnuatsh tshipuamunanu tshima taship kanuelitamuk nehluen ek^u aishkatsh Tshitshue tshitaimunu. Tapuetatishutau kassinu mamu.

Tshimushuminuatsh, kuhkuminuatsh ishpiteljimatauatsh, shuelimatauatsh, uitishatauatsh uesh uiluu kanuelitamuatsh tshisselitamuna. Takuanilu utapunuu mishue kie tshe takuhimatshetau.

TSHILANU PEKUAKAMIULNUATSH TSHIUITENANU :

Nehluen nikanitsh ashtaik tshetshi kassinu auenitshe nashukau;

Ne kassinu peikutenu kie kassinu Pekuakamiulnu e takuanilitsh tshetshi uitishiuetau ne pukushelitanitsh taship tshe shutshipalitsh, shutishimakatsh mahk ilniuumakatsh nehluen;

Tshitassinatsh e nashamuk eishi ilniuk;

Taship tshika pimutananu nutam ishpishatsh Tshitassinatsh;

Nakatamuatauatsh tshitauassiminuatsh nehluen, tipatshimun, ka nehlnikatetsh mishue tshitassinatsh mahk Pekuakamiulnu ka pimetet;

Miam tshiash ilnuatsh mamu pimetetau;

Tshi natuelitamukunuatsh tshimushuminuatsh, kukuminuatsh tshetshi mashinatahamuk ume ka apateljakuatsh mashinaikan;

Tshishe Manitu nishkumatau ka milukuik kassinu assi kie ilniun.

Ume e nehlushtetsh mashinaikan ekun ne e apishtakitsh patama eshk eka ne ka mishtakushiusstestsh.